

Keizer KAREL V (tevens hertog van Brabant en halfheer van Hilvarenbeek) verleent toestemming tot de wederopbouw van de oude en vervallen kapel in het gehucht Groot Westerwijk onder Hilvarenbeek bij oorkonde van 31 mei 1549.

(Kerkarchief Hilvarenbeek)

KAERLE by der gratien Goids Roomsche Keyser, altois vermeerder t<sup>s</sup>Ryck, Coninck van Germanien, van Castillien, van Leon, van Arragon, van Navarre, / van Naples, van Cicillien, van Majorque, van Sardanie, van den eylanden van Yndien, van der vaster eerden, van der zeeoceane, Ertshertoge van Oistrick, Hertoge van Bourgog<sup>n</sup>en, van Lothryck, van Brabant, van Limborch, / van Luxemborch ende van Gelre, Grave van Vlaenderen en van Arthois, van Bourgog<sup>n</sup>en, Palsgrave ende van Henegouwe, van Hollant, van Zeelant, van Ferrette, van Phirt, van Haguenault, van Namen, / Prince van Zwave, Margrave des Heylichs Ryck, Heere van Vrieslant, van Salins, van Mechelen, van der Stadt, Steden ende Lande van Utrecht, van Overijssel, van Groeningen, ende dominateur in Asien / ende Affricquen. Allen den ghenen, die dese onse brieve sullen sien oft hoiren lesen, saluyt. Vanwegen der ingesetenen ende gemeyne naeburen van den gehuchte geheeten Groot Westerwyck, onder de / prochie van Hilvarenbeke gelegen, ons verthoint ende te kennen gegeven, hoe dat hier voertijden over de hondert jaren oft meer geleden, emmers over alle menschen gedenckenisse, / in den voirscreven gehuchte van Groot Westerwyck, gemerct tselve gehuchte verre ende wyt is gelegen van der prochiekercke van Hilvarenbeke, daeronder zij resorteren, heeft gestaen ende / bij den voirsaten van den supplianten aldaer gefondeert, geërigeert ende gestelt is geweest zekere cappelle, diewelcke aldaer noch jegewoirdelyck met zekeren outaer daerinne gemaect staende is, om / ten gerieve van den ingesetenen van den voirscreven gehuchte daerinne misse te celebreren, welcke cappelle van oudtheyt zeer is vergaen ende vervallen ende dagelyck meer ende meer ruyneert, / welcke cappelle de voirscreven supplianten gheerne souden doen reëdificeren ende vernyeuwen op te selve plaetse, daer dezelve jegewoirdelyck staende is, hebbende daertoe verworven, zoe vele als 't der / spiritu- aliteyt aengaet, oirlof ende consent van den Bisschop van Ludick, maer besorgen de voirscreven supplianten, gelyck oick ennige pretenselick willen seggen, dat zij tselve nyet en souden mogen / doen sonder onse octroy ende consent onder 't depot van der ordinantie, bij ons in den jaire XV<sup>o</sup> XX in Octobris gemaect, dicerende dat men van dan voertaen nyet en soude moegen doen tymmeren, fonderen / erigeren noch doteren ennige nyeuwe kercken, cappellen, collegien etc., hoewel dit nyet is contrarierende der voirscreven ordinantie ende statute, gemerct de supplianten alleenlick begheeren die voirscreven / oude cappelle, die als voirscreven is van oudtheyden vervalt, te reëdificeren ende vernyeuwen, nyettemin tot meerdere versekerheyte van de voirscreven supplianten ende om alle zwaricheyden, die hier / inne souden mogen vallen, te verheuden, soe hebben ons deselve supplianten oitmoedelick gebeden om onsen voirscreven octroy ende consent ende hen hierop te doen expedieren onse opene brieven in sulcken / saken behoirende = DOEN TE WETEN, dat wij de saken voirscreven overgemerct, geneyght wesende ter beden der voirscreven supplianten, denselven hebben in den gevalle als boven geaccordeert, / geoirloft ende geconsenteert, accorderen, oirloven ende consenteren by desen onsen brieve, dat zij de voirscreven oude ende vervallen cappelle van nyeuws sullen mogen doen reëdificeren, erigeren / ende opmaken op te selve plaetse, daer de voirscreven oude cappelle alsnu staende is ende daerinne missen doen celebreren tot gerieve van den gemeynen ingesetenen van den voirscreven gehuchte van / Groot Westerwyck achtervolgende den consente van den voirscreven Bisschop van Ludick, sonder daerom tegen ons oft onse voirscreven ordinantie ende statute te misdoen oft mesgripen in enniger manieren, / ontbieden daerom ende bevelen onsen lieven ende getrouwen den cancellier ende leden van onsen Rade geordineert in Brabant, schoutetten van den Bossche ende van Oisterwyck ende allen anderen / onsen ende onser vassallen ende der smaelre heeren, rechteren, justicieren ende officieren onser voirscreven Lande van Brabant ende hueren stedeheren dien dit ennichssins aengaen sal mogen, dat zij de / voirscreven supplianten van dezer onser jegewoirdiger gratien, octroy ende consent, in der vuegen ende manieren boven verclaert, peyselyck ende vredelyck doen ende laten genyeten ende gebruycken sonder hen / daerinne te doen oft te laten geschieden ennich hinder, stoot oft letsel ter contrarien. Want ons alsoe gelieft. Ende des t'oirconden hebben wy onsen zegel hieraen doen hangen. Gegeven in onser Stadt van Bruessele den lesten dach van Meye in't jaer Ons Heeren duysent vijfhondert negen ende veertich, van onsen Keysericke 't XXXe ende van onsen Rycken van Castillien ende anderen 't XXXIIIIe.

By den Keyser  
in zijnen Rade  
Boudewijns